


24072
-8

232

117

138



重刻杖左堂詩集序

我鄉松坪孫先生於前戊辰登魏科迨余幸南宮適
花甲一周真前輩也余總角時曾識先生於里第以
為天上人後稍知拈韻即奉杖左堂集為拱壁知之
最深歲已巳承乏少陵書院維時從遊士不遠千里
先後至者數百文行之外顧名思義兼及詩歌未期
月諸生進而問曰自弟子受教以來於文則宗八家
於詩則宗少陵於

本朝則師王阮亭今時則有張南華阮亭出藍歷下

不知南華之學亦有所自乎於我師為同里願聞其
略余曰詩學豈易言哉就我鄉而論四先生外尚不
下十餘種孰非家稷契而戶臯夔而其英綜衆流導
乎先路者則莫如松坪先生矣因出秋左堂集示之
諸生復請其詳余曰河流九折也出碣石則彌雄王
耀連城也孕藍田則更貴先生之詩氣韻沉鬱言其
意表頗近謝康樂蘊藉脫落不染塵氛有類岑嘉州
颯颯乎仙遊英英乎霞舉又善學李供奉至於格律
嚴警雄深渾健則非少陵不可擬古詩俊逸如王子

晉向月吹鳳笙隨風抑揚聲在雲外今體澹宕猶長
安少年飲酒百華場中鶯歌蝶拍春風煦然樸人終
日傳杯而醉達旦不休詩人之趣至是亦可謂之不
凡矣蓋詩品貴高必天賦超軼之才具瀟灑出塵之
致有振衣千仞濯足萬里之概而後藻思不羣才備
矣取法欲上原本風雅及於楚騷兼乎漢魏式乎大
歷為之軌度宋元以下亦宜別之以授我裁成取法
得矣又必有穎悟絕特之資而濟以該博宏偉之學
察乎古今天人之變而通其洪纖動植之情然後足

以奔馳百氏而馳驟千里功加矣又必具溫厚和平
之養嚴莊凝重之度然後其音淳龐而雍和鏗鉤而
鞞鞞亢戾消則氣象從容弇鄙去斯尊嚴典雅養優
矣處江湖之遠必得山川之助呼吸穆清吐納雲氣
凌萬頃之煙波登峭削之危巒氣勢恒連乎霄漢而
又有草木蟲魚之玩林樾蒼碧之瞻俾精神凝合物
我兩忘居廟堂之高覽乎城觀宮闕之壯陳綱布紀
之宜典物文章之美兵甲車乘之雄朝會燕享之盛
及乎郊社禘嘗鐘磬干戚之儀備斯數者然後可以

言詩矣置品不高負骨匪異其識必陋以卑師法不
古綺麗為工其音必靡而滯學之不克則師心自用
空疎寡當其辭必蕪而龐養之不遠則難言風度必
流於下里巴人無江山之勝則塵土之思膠擾蔽固
無以發揮其性靈鮮巖廊之觀則風雲月露之形園
廛漆林之礙其情必湮而鬱古之人所以擅一世之
名雖其格律有不同聲調有不齊未有不資乎此六
美者也而惟先生則兼之是固先南華而唱後阮亭
而和而實祖述乎少陵諸生有志吟咏舍是將奚取

則焉於是羣仰先生為少陵的派而杖左一編遂大
行於鄒魯間壬申秋先生之外孫悅巖程君蒐羅散
佚將彙付欵刷索序於余余竊謂初刻二冊南華嘗
言其梗概而去取實定於朱君厚章大半皆先生少
時所作以為不必取名位進年壽崇為準的蓋厚章
所見多外間泛辭故有是語顧近日名公如杜雲川
樓西浦輩俱極口先生晚歲詩學益進雖率然應酬
遇方成珪遇圓成璧無一言可移置他人他事者今
欲信今傳後豈容登其堂不歷其奧窾耶因即以言

於諸生者書於其端而表重刻之意云

乾隆十八年四月望日同里後學秦倬拜書於山東
少陵書院

吾鄉勝國諸先輩多以古文辭著稱鮮有及韻語者
方其初王常宗徵士倡論排楊鐵崖學者始知文有
正派而其詩殆不可讀嘉隆以降唐叔達婁子柔李
長蘅徐汝庶四先生師法歸太僕檣柱王李顏波而
詩視常宗篇什亦稍富貞文黃先生繼之可謂盛矣
要之精力盡於古文詩持縱筆而出蓋非其意所屬
也入

本朝於是陸菊隱張樸村孫松坪張匠門趙蒙泉張
南華六君子者相繼出或端攻詩或並治他藝然皆

彬彬具體與勝國先輩以詩為餘事者有異就六家中最工莫如松坪先生左太冲有言曰發言為詩者詠其所志也登高能賦者誦其所見也中有所志外有所見而假於詩以鳴似若無取乎古人者然沈休文叙次兩漢魏晉及南朝之詩人而總之以為騷流所始同祖風騷夫兩漢魏晉及南朝之善詩者亦不過各寫其所志所見云爾於風騷何與而休文斷然言之蓋古今之心一也中有所志外有所見而假於詩以鳴迨夫造意鏤詞結體布格之既備而以絜諸

古人靡有不合者也若其本無所得而斤斤焉求離合乎古人雖取徑不一而其失則均松坪先生之詩枝條豐縟光澤鮮好徐而察焉則凡愉快悲憤其志者皆可考而知也凡平生經歷自山林而邊塞而館閣其所見者皆可述而志也蓋根本自得而能多師以為師譬若蜂之釀蜜蜜成而不見有花信乎其工而可傳矣先生初名翹夢人受致彌二字示之更今名字愷似別自號松坪居士早以國子監生膺

授 蜂

聖祖特達之知奉使朝鮮賜一品服未受官遽歸年四

十餘成進士選入翰林坐事去官幾不測後得白終
侍讀學士集曰杖左堂集別有未申集先生被難在
未申兩年故云今皆掇入全集又有梅泚詞別花餘
事詞衲琴詞先是趙先生三張先生集已刊行今先
生外孫程君宗傳復盡刻先生詩以傳於世而菊隱
先生集卷帙甚繁今里中雖有鈔本莫為刊布將就
堙沒斯文之有幸不幸豈不重可慨與予尤嘉程君
之志行有不同於流俗者故附著之
乾隆二十年歲在乙亥春季上巳後三日同里後學

王鳴盛頓首謹序時寓京師淨業湖南

孫松坪先生杖左堂詩原刻六卷朱厚章稱其才華
富有格調工絕不虛矣其外孫宗傅程君復爲續集
三卷梓之吾讀其詩信學士之多而益工也昔人之
言文曰歡愉之辭難工窮苦之言易好松坪此集雖
多酬應招邀之作然雄放鮮新才力聲韻時出筆墨
之外歡愉而能工窮苦而不激蒼茫霜夜寂漠江天
雁響悽清孤館寒燈僕本楚人能爲激楚展讀之餘
笑蘭泣蓉碎玉叫鳳如聽李憑箜篌不覺起舞也茲
刻行原詩益足以傳矣

松開城鵲頭山舊為松岳今已童矣篇什收鞮譯歌謠采邨廊成風

煩斲鼻列宿見羅胸抱璞非和氏焦桐遇蔡邕散財

歸隲括大冶徧陶鎔琬琰 奎章煥琳瑯 御墨濃

時恭奉 御製 御書以示彼星虹光煜爚雲漢氣蔥龍仰見 皇

猷遠能忘侯度恭驪歌何促迫騶唱肯從容駐王京 僅八日

帝闕行方近仙槎路莫從遙瞻天咫尺願學水朝

宗愧乏新羅錦因君獻 九重

賦得花柳含丹日

上林深雨露麗日復中天纈蕊頻舒彩絲楊乍拂煙

陽和迴浩蕩卉木競芳妍願駐重光照長留 禁籞

前

其二

罨蝶紅英密藏鴉碧縷深向陽俱得地就日共傾心

的皪薰妍影熹微閃綠陰春暉何以報寸草獨沈吟

詠夏

修景纏南陸離明紀祝融炎蒸移月令長養見天工

鼓偃昇平日絃調解愠風乘時惟火德平秩 聖人

功

其二

日長垂夏正時燠叶箕疇宣夜占朱鳥勾陳駕赤騮
峰奇雲屢變土潤雨偏稠聞道于苗處恩從扇暘流

其三

燧人鑽棗杏樂正合笙竽欲獻醴泉頌先傳雲漢圖
日應如趙盾雨恰憶夷吾詎假尋河朔炎威避玉壺

其四

豳土莎雞化陶廬草木長覆施天不倦發育物皆昌
日午耕耘苦風微殿閣涼恢台忘 帝力隨地得義

皇

飲酒

軋軋鳴柴車葉葉搖酒旆多謝棗林人遠送新釀至
馨香羅牀頭涎流不可制車子作好語留醉新及第
咄嗟酒家傭使我發長喟我聞古酒人往往薄名位
但愛飲酒樂不慕僕射貴叔夜豈不達作吏此便廢
不幸如若言其苦乃不啻身作三日婦車中常閉置
傴僂謁達官磬折復屏氣時或持一卮終日百拜跪
矻矻窮晨昏何暇識酒味揮手謝斯人終宵不成寐

捉鼻恐不免誤我麴蘖事凌晨聞撒棘幸不掛名字
科頭發大叫良復快我意且喫三年酒再應七篇試

其二

野人如山麋世味一何淺冠裳苦微纏林壑情纏綬
飢驅生理促長裾暫游衍依人銜泥燕果腹飲河鼉
所欣幸舍門正直瀛臺苑昨來時雨過已覺光風轉
苑樹綠參差宮鶯語睨睨塵消碧瓦明冰泮玉泉暖
檐牙掛蛛絲時罥落花瓣開我桑落樽听然自飲滿
一為獨酌謠坐使萬緣遣無為長鬱紆負此堅昆盃

其三

少不樂鉛槧揣摩及陰符家傳驪山注夢受魚復圖
技成二十載躑躅猶泥塗伏波虎空画評漫龍難屠
夜來臨麴部拍浮共歡呼陰以司馬法部勒諸酒徒
信如立表期肅若銜枚趨天衝及地軸變化存須臾
沈冥有妙理擒縱通孫吳盟府冊酒勛可比英衛無
斯言太遊戲且復傾我壺

三月朔茂叔旦黼招為西山之遊道上同蒼霖
中立作

尋山有約覺身輕纔出城闈眼便明半夜雨催春樹
綠一天雲散曉峰晴撲人花片太無賴迎客泉聲不
世情好向煙霞最深處狂歌縱飲任吾生

中秋後一日同華亭錢越江石門吳青壇常熟

歸惺厓武進楊芝田嘉善曹蓼懷吳縣沈東田

華亭陸敬峰崑山葉淵發澄夏吳江周惟念雅

集芝田有作次韻和之即以留別

是歲七月地震不已九月

望當月蝕
予將南歸

身世真同不繫舟樽前無地可埋憂坤輿未奠金鰲

極宣夜遙添玉兔愁舊友書爭貽撲滿故山亭早築
宜休安危擔荷須君等莫但鳴珂擁絳騶

泉州贈蘇小眉

吾友婁江生客游燕臺歸自言結客徧傲世罕所推
獨數二蘇賢達且都忘疲云君與結交信吾言非欺
皇帝十二載僕亦遊王畿解鞍即懷刺訪之城西陲
小蘇方遠宦五馬擁旌麾正得見長公玉局神仙姿
握手意氣合不異針與磁抵掌談古今一掃經生辭
妙理見天人超超千秋期於時方太平春臺樂熙熙

側聞晁錯謀蒿目同盱眙嗟彼巢幕燕多君炳先幾
杞人憂未已羽檄俄交馳余占鳥焚巢竄身長河麋
聞君擅才傑出贊征南師所至為軍鋒威震恩亦隨
一舉清東南反側就勒羈方知天下士所試無不宜
謂當列屏翰猶屈佐郡卑昨者客丹霞輿誦播四垂
不辭嵇生駕從君慰相思僕本蓬蒿士仰荷 天皇
慈賦詩奏便殿擁傳馳句驪歸就京兆舉未得登彤
墀出處有義命詭遇古所嗤遠遊為交親非求衣食
資為別僅十稔此意君應知蠻城多刺桐山酒足荔

枝風塵久飄泊信我雙愁眉歸當就江郎同寄懷君
詩

閏中秋陪李水心吳香為李辰玉三先生宋旣
庭業師集余徵君宅同和申文定公韻

莎階蟲語露華寒叢桂扶疎尚未殘千里故人今夕
合一年佳節兩回看秋如久客逢餘閏月亦多情續
舊歡容易共尋聯句會莫辭相勸酒杯寬

別楚狂三年矣庚申冬相遇吳門醉後讀其庚
申日記至燭跋乃已枕上口占十絕句為贈

南樓判袂倏三年春渚秋衾夢屢牽此夜挑燈披日
劄只如日日與周旋

其二

落燈時節酒船開曾過柴門題鳳回却悔千山空浪
跡杜鵑聲裏未歸來

是歲元宵君過訪寒齋予尚滯閩中也

其三

玉署貽芳見二難偏憐狂客聲交歡清溪沽酒銅坑
雪處處相將爛醉看

首句謂淵發澄夏

其四

江上布衣口懸河羅浮仙客何英多苦遭楚狂惱不
徹滿篋長吟復短歌

日記中載璞庵翁山詩甚多

其五

前身曾侍玉宸班終擬雲房煉九還却怪主人高索
價要他杯酒買青山

用九峰主人語

其六

十載鄉心託余峰揭從白日訪仙蹤道人不識身何
似十丈蓮花百尺松

父名我以蓮號我以松皆日記中語

其七

仙侶耕煙還釣月禪宗無著與天親羨君只合隨君
去做個拈花調鶴人

山中有耕雲道師及
墨浪香峰諸和尚

其八

去年歸權感人琴被酒西州淚滿襟留得一枝金粟

在秋風吹折更傷心

客冬武東歿今秋子
豐繼之皆君至交也

其九

老去閒情水月參好花偏稱白頭簪歌邊雀舫管騰
醉燈下羊車旖旎談

其十

口吟目覽徹三更都忘輕寒著背生半卷忽驚銀燭
跋擁爐欹枕待天明

送楚狂入佘山用寒字

南池明月西山雪十載曾同馬上看笑我風塵裘易
敝輸君懷袖刺常漫圖書未厭歸裝薄杞菊新添活
計寬記得先師留識好幽棲真向白雲端

有嶺上白
雲之識

魯謙庵先生以雪田翁画峰泖圖索題走筆為

長句

會稽先生中牟裔舊是玉皇香案吏染翰親依日月

旁分符不倦登臨廢琴川演漾烏目高浮玉俯瞰揚
子濤一麾十載五茸佳九峰三泖供遊遨群峰叅錯
環城北雲岫煙林相斷續九子空誇供奉題九疑想
像湘江曲別有煙波涵百里黃金宰堵中流起杳靄
西連笠澤雲蒼茫東走春申水湖光山翠繞城來襦
袴歌中郡郭開澄波便是投香渚碧嶂還如擬峴臺
拄笏蕭閒愜幽志時復留賓張水戲清風拂袖甌生
塵只貪飽看湖山麗擅場画手雪田翁解衣盤礴經
營工為公點筆圖素扇長留鈴閣揚仁風後堂弟子

戴彭比展圖不覺心神喜都將山高水長思寫歸尺
幅丹青裏吾聞羊杜昔登臨峴首青青漢水深君看
繪事留傳久直與豐碑共古今

題徐侯齋先生画

避世高風不可攀芒鞋竹杖水雲間尋常歌哭無人
會自寫胸中得意山

其二

青芝山下記幽居峰翠溪青画不如寫徧義熙新甲
子只將名姓溷樵漁

次韻題雲怡老人曲子

却老何須玉杵霜徵歌猶發少年狂銀泥舊譜傳無
誤瓊樹新聲好不忘舞袖最宜香旖旎看場須拚酒
淋瀝風流老輩誰能似鏤管花分檀板香

五月四日西又賓臣大生服尹震為過余瑤草

山房小集同用三肴韻

閒門清晝寂小徑綠陰交樹老叅天幹篁垂滴露梢
香蒲將泛酒苦筍尚充庖正愛提壺勸俄聞啄木敲
真如磁引鐵豈但漆投膠賓主何由辨琴書且暫拋

醉人君幸恕熱客我無嘲觥記頒金榜

是夕以古法
琅盃行酒有

會元字蓋明初
南宮宴具也

著初揲寶爻

大生筮秋試
得姤之比

漏催銀蠟

炮簫待玉人教計日行攀柳占星只繫匏幽芳蘭在
谷薄俗芥浮坳自昔期梁棟其誰臥草茅明朝看奪
錦雲雨變龍蛟

新秋陸鶴坡招同董夢龍年伯張學之董新日

徐西厓盛賓三集竹素堂限韻

望衡對宇過從便况遇良朋共酒船南極星辰尊一
老西園圖画集群賢梧桐紀閨垂陰密菡萏迎秋出

水鮮最是幼輿巖壑美莫耽雲臥負華年

其二

促坐留歡過日斜情深孔李舊通家才名早識平原
賦踪跡休論博望槎史筆褒譏嚴衮鉞酒兵約束變
龍蛇亦知吟詠真餘事鏤管爭看夢吐花

曰恕屢餉名酒佐以珍饌口占謝之

翠釜銀罌繹絡陳荒厨破甑失清貧杯浮花露醜顏
易箸下尊香動指頻鳧臠脆兼生菜美雀肪肥及裹
綿勻老饕傾倒分甘意醉飽從君過小春

碧蓮僧舍爲盛悔亭題劉巢雲画寒林返哺圖
涼飈颯颯錦樹枯僧樓愁見歸飛鳥巢雲画史得此
意鵝溪潑墨風煙疎吾友遠遊因負米什襲此圖巾
笥裏今朝掛向客窗晴返哺區區寸心慰倦遊詞客
思曹騰對此重教感慨增春暉寸草無由報注目寒
林暗撫膺

老樹

鴨脚何年樹盤根古寺隅駢枝擎雪秃老幹宿雲孤
黠鼠無時定飢鷹盡日呼僧樓有羈客對爾獨躊躇

嚴石樵招同張仲垣盛悔亭沈相如遊弁山白

雀寺訪古劍和尚即事次仲垣韻

梁比丘尼總持出家於此

有白雀青蓮之異寺額為顏魯公手書

橋畔松杉翠染裾蕭梁古寺總持餘空留白雀青蓮
蹟長伴銀鈎鐵畫書談虎小亭風色變尋僧丈室世
情疎宗雷舊社詩能寄三十六陂多鯉魚

三疊韻贈石樵

先扶桑兄同年故有三句

詩仙塵表燦霞裾第一清流正始餘舊好漫追龍尾
道新恩待賁鶴頭書長齋繡佛容人醉小枝雕蟲愧

我疎霄雪苔雲堪泛宅從君折芟共焚魚

石樵為余序朝鮮采風詩六疊前韻以謝

萬里王程紀絕裾口銜

天語到扶餘謬膺

聖主

非常遇遠購中朝未見書頂踵難勝

恩浩蕩篇章

終愧學迂疎非君綵筆重題拂只合空箱飽蠹魚

北行期迫別仲垣賓三先理歸棹兼似石樵令

名受公佩周七疊前韻

軟紅塵裏曳長裾回首東華五載餘瘦馬又催偕計
吏驚猿應有絕交書夢尋吟畔蘋香遠醉望高齋樹

影疎想得相思多麗句好緘尺素託雙魚

寒夜集服尹書巢同賓臣大年維水侍東臯先生
生做鐵厓花遊曲以閒徵雅令窮經史爲韻

歲何急若其寒徵環川大壑皆層冰狂生浪漫奚爲
者當杯猶自耽風雅盤餐錯落山海窮饜飫毋乃便
饕翁搜腸擢腎窮酒令坐使聱牙失聲病諸君莫惜
頽玉山糟丘之築亦等閒酒能作病良可止請立之
監佐之史醉人謬誤語不經焉知吾儕非酒星

示同學諸子

當筵暇豫唱烏烏擇木休論苑與枯不受玉鞭真驪
裹能逃鐵網是珊瑚閒身正好聯吟社好事從教喚
酒徒試問科頭箕踞坐何如屏息沒階趨

趙執信曰
結法甚陡

意亦
峭厲

送汪宇昭歸杭州

次韻

南菊繁英漸可餐軟紅那復戀長安怡隨燕子辭秋
社肯借葡萄博好官燕筑醉來留縞帶吳航買得勝
雕鞍西湖鷗鷺驚還喜煙水深盟且未寒

獨飲至醉戲作俚體四首示知我者

仲翔骨相本來屯厄似黃楊瘦翠筠小學祇能通甲

子

夏侯湛抵疑諷
急就習甲子

大還豈耐守庚申中書君已頭將

秃列地封難手不靴腫背索駝吁可怪莫辭邑犬共

狺狺

其二

偶逢教調頰先頰更許誰同叔夜鎗勇決固應呼鷁

弟清芬只合對梅兄入秦術恥如張祿之楚言多類

宋犍羊酪不消文士妒須令一一噉倉庚

其三

清淚無端下綆縻負鹽虞坂老雞斯從誇識字弓三

石難博還書酒一瓶肝膽易傾貧到骨鬚髯空磔作

其而可憐竹實淹飢鳳飽食終輸惡水鷗

其四

先後何論陸與種羊公鶴只解蕤蕤求伸以屈龍師

蠖不駿於乘虎負驂魯壁許田供鄭假宋城墨帶耐

輸攻野人醉裏忘齊物螺贏螟蛉是二蟲

送同年阮巖公南歸次越江韻兼寄王璞庵金

憲臣蔡龍文陳挹蒼江德園蔡鉉升胡孟行蔡

幾先潘與久

貂裘同敝缺同彈兩度風塵共歲寒自悔冥鴻隨燕
雀相憐飢鳳啄琅玕故人惜別貪期改瘦馬衝霜怯
路難好待柳衙花信早金錢爛醉與君看

其二

秋來日日送人歸轉覺騎驢旅食非開徧黃花君又
去望中錦樹葉初飛秦淮喚渡潮平岸牛首尋詩翠
染衣舊雨旗亭同買醉孤雲應念獨無依

太史銀章歌爲宋葑州庶常賦

長洲太史富二酉弱冠雄文滿人口玉署新邀 聖
主恩銀章舊向嚴君受君家忠孝世清門上台調燮
追開元潛將輔相贊造化獨以公忠結 至尊相公

釋褐秘書院私印雕成玉箸篆朱絲繫鼻錦囊盛花
磚日夕供清玩翩翩珠樹鯉庭趨指點之無骨相殊
膝前親解白金鈕肘後懸同紅螭珠今來射策延英
殿文章果冠瀛洲選世掌絲綸到鳳池此印分明操
左券黃扉劔佩結西清蓮炬分來近火城自向韋門
傳相業豈惟劉閣繼才名什襲緹函藏弃密鼎彝詒

謀存舊物更待丹山小鳳鳴傳家直比文貞笏昇平
盛事記前朝四字圖書寵巨僚期君啓沃追楊夏銀
印重看下九霄

次周宜一碧桃詩韻寄陳子萬子萬往官黎城
黎有名倡碧桃歸貴公子公子歿復歸於黎子
萬為賦碧桃詩宜一和以示余讀之有感因用
韻作四絕句以示子萬

分手銀灣雁信稀栽花應念舊荷衣誰知大鳥真凡
鳥兩度三年未一飛

戊子秋別子萬於中州會館之
銀灣王文安公所題也子萬望

子甚切顧屢被
放斥殊自慙也

其二

仙令風流夢見之訟庭無事日裁詩能忘半月臺邊

夜笑擁蓮鴻昵酒時

記辰巳之間與子
萬章仲遊單縣事

其三

薊邱秋盡草離離對酒思君知不知空谷賣珠人漸
老可能唯賦比紅兒

其四

琬琰遺編手自披頻年徽軫輟鍾期惟餘季子憐狂

客偏賞貂裘換酒詞

其年檢討輯其先宮保以來投贈詩文為琬琰集載余贈子萬

貂裘換酒詞

周礪巖編修招集一畝居分賦得秋霽限三肴

十二韻

黃雀雨初歇幽探愛近郊晴光開廣幙秋色集塘坳
塵斂金莖側煙輕錦樹梢地偏涼吹拂天迴濕雲捎
碧水窺蓉影清霜綻菊苞登臺嵐翠滴凭檻竹聲交
石冷垂藤縛窗虛墜葉敲欄庭蟲唧唧蘆塞鴈咬咬
氣爽簷牙接泥乾屐齒拋跡同烏集闕身羨燕辭巢

南浦鱸魚膾西山橘柚包越吟寥泚裏憑付小奚鈔

贈王黃眉給事

岱宗表齊魯華嶽雄咸秦卓犖見二王風骨同嶙峋
斯文得所寄騷雅披荆榛古調發窈妙高舉離塵氛
天然去雕飾力挽皇風淳我讀邵陽詩新城勤討論
髣髴仰三峰秀色撐秋旻白雲翳其顛俯瞰洪河奔
回頭望日觀靈異互吐吞丹雘不可梯惆恍搖心魂
安能生羽翰揮手尋真源

其二

大儒實天寶出必濟世用張弛經綸際能使科名重
小試在牛刀遺補叅侍從封事掃華言一一詳而中
建邑靖萑苻蠻風變溪洞楚塞鞏金堤手援爲魚衆
恥學楊馬輩百勸而一諷清廟珍瑚璉大厦資梁棟
許身稷契間卑卑視姚宋高岡鳴雖啣逸驥天衢縱
願言致昇平餘力正雅頌

送禹平歸嘉善兼寄青城先生及寓匏翰周

霜葉飛如舊酒徒殘秋爭與雁南徂衝寒又送斑駘
別警露空憐病鶴孤柳岸曉風三變曲竹林夜飲七
賢圖故人倘念蓬飄客爲報琉璃硯水枯

疊韻酬王后張

聚比流萍散比蓬七年溝水怨西東敝衣至骭憐齊
相名紙生毛笑魯風識面憶從童穉日論心早託顧
厨中輸君意氣偏豪上醉吸長鯨象鼻筒

疊韻酬椒巖

老屋牽蘿繞徑蓬相望百里共江東雞盟未改乘車
日鶴陣頻趨免胄風獨歎漁竿淹幕下即看錐穎脫
囊中七襄織就天孫錦管蒯何由貯一筒

東暉晉明三疊字昭韻

若爲使我不能餐繞樹何枝可即安金買驂騮輕瘦
骨盤堆首藉笑微官歌魚客子羞彈缺遺矢將軍想
踞鞍只有天公憐勸旅孟婆猶緩朔風寒

其二

野菊摧頽也自黃浮雲黯黯月茫茫愁心終恨燒春
薄節物難逢粗粃香從古燕歌多遠別只今吳語共
他鄉相過一飽惟蔬菜踪跡居然類亥唐

大冶先生生日詩

大冶先生古名世金經百鍊材千尋磅礴地靈滙西
塞淵源祖德標東林才華早歲歌郢雪經綸大旱爲
商霖一生溫飽非所志四海飢溺爲已任碧衣對後
分丹筆青鎖名入光華簪在唐比徵宋比錫俯視西
漢永與欽旋登柏臺佐執法手定雅樂調元音江淮
八州困庸調滌戟忽挾春風臨民風還淳民氣樂膠
澄河濁痰起鍼蕭規曹隨顛畫一滂沱之澤留於今
九重久弄趙堯印鋒車促駕辭江潯獨坐天綱昂畢
肅亞相地望風霜森承 帝曰咨掌邦計天庾粟涌

泉流金蠲租賜復歲屢下敷天蔽芾依棠陰奎章光
爛東壁府河宗寶秘西崑琛高文典冊歸鴻筆星紉
雲縵賡虞琴公舒所蘊百之一恩已汪濊流蒼黔爰
立作相定早晚徧慰九有喁喁心海隅鮪生飄蓬客
瑟縮甘作書中蟬馬周作客久流宕桓伊可笑真嶽
嶽鹽車昂首邀一顧驂騮側畔驟駸駸豈徒下階見
駸茂直以謀野知裨諶秦郵冢宰公知己相期台輔
貽良箴圮橋何幸容進履法言鄭重書衣襟無媒自
安妾命薄善誘難忘師恩深韓門已許班籍湜謝砌

兼得依球琳我師歲寒挺松柏陽迴不受冰雰侵嘉
平之月月幾望弧南星映旗橫參崧高生甫當此日
天壽平格神所歆名康期頤衛武耄上庠饋銷何惜
惜彌也嘗讀華亭榮壽錄煌煌綸綍羅謳吟師生盛
事播吳越願洗康爵歲歲爲公斟大書特書公勛德
磨厓勒諸神禹岫嶺之高峯

公少時受知王文通公
常舉其格言以誨致彌

故篇中及之榮壽錄張文
忠爲徐文貞八十壽者

題查夏仲抱膝圖次錢玉友韻

面不借荀文若鼻不捉謝安石平生未見如此人萬

馬群空騰鬣膝壯采紅爐赤堇銅希聲清廟朱絃瑟
畫圖託興比隆中何異雪鴻留爪跡崔徐章句誰能
傳鹿門沔上相追遊蕩陰自笑齊相國新野未逢劉
豫州昨訪故人西南陬浙矛炊劍經炎州諭蜀文傳
魑魅喜討曹檄出奸雄愁碧雞金馬開化日蟲神猫
鬼藏清秋赤手便拔石虔箭柔翰直拖陳安矛未甘
小草就秋賦異材恥受常格收辟如良農力薦藜肯
持豚酒祈車篝南陽三顧始一出千秋此意差堪俾
嗟哉我爲若楚歌衰鳳已而已魚水遭逢會有時無

忘同訪赤松子

歲寒雅會疊前韻呈越江椒巖

我身不適於世用喟然大瓠空五石慎交頗識父師
訓進人不易加諸膝有如碧眼老波斯淘汰泥沙揀
瑟瑟鳳集有翼龍宗鱗肯逐兔狐問去跡歲寒燕市
此命儔不學荆高矜俠游直教騏驥空北野豈惟竹
箭收南州顧我端木慙卑陬宿莽亦得塞中洲老革
眉頭信平聲此夜仰天豁盡愁雲愁水零獨立見松柏
不隨蒲柳凋先秋勗哉堅比雷義漆嗤彼伐以康成

木石堂集卷之三
三
予河汾將相况有託講堂羅列多藏收

謂賓王
瞻度

更求

都梁配迷迭雙煙一氣薰秦篝梅檀香林無雜樹
藤蕪寧與蛇牀侔上邪相知方未已淡水之交見君子
夢遊天柱峰歌為青壇御史賦

吾聞謝太傅道不忘邱壑又聞李鄴侯餐梨懷採藥
古人高致今誰儔吳侯矯若雲中鶴朝焚諫草直西
臺夜夢青鞋訪南嶽雲衣風馬何飄然千巖萬壑相
洄沿心知一峰是天柱孤高拔地凌蒼煙神搖目眩
不暇賞飛身便躡峰之顛峰頭別自有天地俯視人

間但雲氣仙治神都異晦明巖扉磴戶爭虧蔽琪樹
常同燭夜開玉芝不解經秋墜丹竈猶封白鶴看素
書未啓青鸞寄徘徊舊蹟省多生霞帔霓裳帶笑迎
紫蓋峰遙同策杖朱陵洞口合吹笙山中真樂松筠
愜世上浮名黻冕輕喔喔天雞催海日蝶胥栩栩須
臾失塵緣且待慰蒼生靈境欲留那可得詰朝邀我
綠醅開細話名山入夢來豈效微之傳艷曲應知太
白擅仙才長安城中宦遊者軟紅塵土隨肥馬夢棺
夢穢何紛紛鼠穴乘車似君寡君今努力正乾坤後

樂先憂答 至尊好待功成還辟穀乘鸞一謁魏元君

題澹軒公精舍

朱門別起讀書廬
斐几紋紗画不如
最愛青春開萬卷
肯教夜雨負三餘

其二

紅碧籤分四部多
退朝花底廢吟哦
積書巖許誰津逮
只有詩仙與墨娥

其三

綠沈金鎖見英雄
章句羞將措大同
侍宴偶然題競病
一時文陣盡趨風

其四

書帶侵階碧草齊
洛如花放曉鶯啼
春風列邸笙歌沸
冰雪惟將一卷攜

送鄭桐源歸秦淮

柳岸驕嘶白鼻騮
笑携詩卷別京華
六朝山色仍如画
一路鄉音漸近家
投簡爭誇梁苑雪
典衣多醉秣陵花
秋期莫爲蓴絲誤
早趁霜前鴈字斜

君客於裕邸期以

秋間
再至

落花次徐實均韻

梨雲夢斷粉牆東送盡韶光淚眼中恨不折來同曉
露枉教開處費春風魚牀流影晴添綠燕壘餘香濕
帶紅好待明年芳信早春生三十六離宮

實均招同東發雨稼文升用儀扶暉朗行霖蒼
集冠山堂分賦時予將之曲阜扶暉歸寶應

冠山堂邊千章樹叅天新綠何婀娜求友黃鸝接翅
來睨皖深枝雜花妥香雨初開芍藥苞煖風欲熟櫻

桃穎此時卜晝敞華筵把臂同心一笑嗟入門高興
輒投轄驚座雄談爭炙輶隱囊塵尾笑相將鬪草彈
棋無不可文章有神交有道杜老之言豈欺我多君
競擅瑚璉珍老我獨愧糠粃簸出處由來信屈伸遭
逢不用嗟坎坷蘭生空谷足幽芳松歷嚴冬增磊砢
飢鷹勿遣翅便低飲鼠休誇腸易果清音寧復藉絲
竹玉山頽唐醉駮駮却移醒石被花眠更掃食單班
草坐何當長此飲厭厭忘却頻年旅瑣瑣只愁踪跡
若雲浮匆匆又見餽糧裹狂客將巾適魯車同心先

鼓踰淮施人生豈長鹿豕聚音書但莫魚鴻左相逢
好待上林春杏子花繁柳枝禪晏迴燒尾賜金錢伴
結鰲頭傾白墮更作紅牋聯句詩旗亭樂部從傳播

題冠山堂呈健庵先生

宣武門前卜築寬過從忘却在長安坐憐綠樹連雲
暗疑對青山隔水寒載酒亭深鄰鶴岩藏書屋小傍
花闌應知謝傅耽邱壑裙屐追陪画裏看

王方鄴張天申以感遇詩見示次韻和之

陽昌壚畔酒誰賒樵採唯應老若耶歷塊馬從嗤跡

池連城壁不掩瑜瑕春歸耕垡牛能叱水長魚邨艇
可拏老我生涯知有托天台歸去只餐霞

寄任坦公次叔毅韻

席帽擅衫各滯淹春來別恨爲君添淡紅牋許詩頻
寄重碧杯難酒共拈郭隗千金知價重胡威一絹見
官廉趨庭暇日揮青鏤賦海何妨不道鹽

其二

育長真見影猶佳秋卷流傳久繫懷倚玉自慙馬齒
長斷金反許雁行排三春書斷勞山曲六月車驅泗

水涯期爾櫻桃開宴早醉鄉隨地把愁埋

酬王元明次來韻陽明先生裔從魏
蓮陸受蘇門之學

鹿洞鷺湖自一時肯將輦輓繡文詞龍場祖德今能
繼蓮陸師承想在茲得路笑人爭小草巢林共我託
深枝寄聲紫蓋雲中鶴終擬同歸太液池

送歸安公以工部侍郎奉命治河

頻年宵旰軫江淮水土司空往汝諧河復早傳歌是
鵠渠成應免竈生蛙由來心事傳飢溺此去民依仗
決排聞道臨軒天語切禹圭計日錫堯階

其二

十五年來謁後塵阮家偏念道南貧金門挾策憐漫
刺錦席飛觥醉飲醇自笑飄零名字改難忘吐握性
情真甲寅春與然明性存輩從
公宴遊予未更今名也明年擬撰河清頌肯
借吹噓徹紫宸

雨中趙恒夫戶部招同諸君子雅集寄園即事
用杜韻十首

尺五鄰韋杜為園即午橋幽懷耽水石佳氣拂雲霄
屢約携琴過翻勞策杖招恐泥鞭款段乘興不辭遙

其二

嘉樹濃陰合迴廊
祥暑清定巢來海燕求友愜林鶯
月俸支官酒天厨出
賜羹却携塵外侶頻向水邊

行

公子官光祿
故有六句

其三

水檻如舟艤巖扉借石支
雲封調鶴徑雨漲浴鷗池
邱壑心何遠煙霞骨自知
坐疑仙路近鶴氅對君披

其四

共啓琉璃匣分題菡萏花
文心曾夢鳥筆勢各驚蛇

自愛風騷近能令朝市賒
淹留拚永夕吳語罷思家

其五

天漏從誰補浮雲且未開
劇乾愁白鷺露濕想黃梅
檢點埋愁地聯翩取醉來
石闌紛貫坐衫袂染蒼苔

其六

翠濕雲邊磴聲喧樹杪泉
異花開紺碧幽草秀芊綿
潑潑魚驚餌蹺蹺蝶化錢
便思移短棹前入武陵川

其七

雨絲添墨潤雪乳泛甌香
近局消清晝移牀就晚涼

忘機齊物我適意各行藏最愛松雲下頰眉映老蒼

其八

地如江令宅客滿衛軍池不惜拋筇簪相從倒接羅
即看珠鳳戲真羨石麟兒群紀吾何有肩差或許隨

其九

握策今劉晏談經昔子雲好奇容問字餘事更論文
碧椀燒春滿紅牙險韻分老成輸健筆醉墨掃續紛

其十

溪亭題櫟樹賓從愧羊何遠道催歸早名園入夢多

同心期好友連臂續狂歌為報東橋竹還容屐齒過

謂小謝也

送顧小謝入歸安幕兼呈魯單兩先生俞彙嘉

史簡臣吳萬子

士生讀詩書於世期有濟安能學脉望狡獪文字內

君看夏畦勞寒女織良瘁安坐衣食之撫心但惶惴

顧言拯斯人一一免顛躓同心有顧郎過我才十倍

斧柯不在手此志何由遂因人效小忠百不展一二

我皇南巡狩昏墊軫睿思簡在司空公建節董

其事幕府藉運籌聞聲相羅致暫著從事衫却策秋
風騎嗚呼七邑民愁雲積嗟喟今茲 聖主恩適與
皇天會從容陪坐嘯囊底探餘智乘時亮天工稽古
順地勢周諮與人誦力矯覆車敝邑免龜目災隄無
蟻鼻潰積水赴歸墟耕桑得次第庶幾為魚衆性命
有所寄我公所臨部濟濟多良吏高密珪璧珍淮安府單
公會稽干莫器淮陽道魯公兩公我所師新奉 簡書至
史子卓魯儔疏鑿精水利俞侯賦伐檀十載河干置
亦有延陵子與我皆同志臭味猶針磁相逢定把臂

共探蒼水簡竚錫元圭瑞河伯雖不仁回心亦相避
利澤苟及人豈必在名位功成早歸來射策丹楓陛
看乘萬里風更作九州被

贈顧梁汾舍人次韓慕廬閣學韻

酒滿杯湖斟酌之舉觴纍十不須辭卦中損益曾占
易閣上功名只賞詩自有文傳郭有道梁汾作納臘侍衛行狀甚

工更無人繼魏無知君為柏鄉公門下士東林祖德垂金鏡肯

信塵封但蓋卮

其二 君藏李文正公題王孟端竹爐新詠卷故有第四句

木石生集卷一
三
紫薇花下舊微之早把人間爵祿辭推枕每牽尊菜
夢看囊只弄竹爐詩著書歲月占松老結想煙霞有
鶴知第二泉香家釀熟年年秋色醉匏卮

送曹次典廷試後歸嘉善次留別原韻

謫仙人偶戲雷車紫府書傳蔡少霞比並春葩如芍
藥天教留作後開花

其二

娉婷不嫁豈蹉跎莫爲無媒顰翠蛾射策平津終第
一古來名士晚成多

